

«Star tar la chaussa è stà sia devisa»

Partida burgais-democratica

DA GION NUTEGN STGIER / ANR

■ **En il center da la radunanza da delegads è stà il cumià da cusseglier guvernativ Hansjörg Trachsel. Suenters ils plets da reconuschientscha fitg cordials èn tuts preschents s'auzads per mussar lur proximitad tar l'um ch'è vegni elegi avant diesch onns en la regenza grischuna.** En rotschas èn vegnidas delegadas e delegads da la Partida burgais-democratica (pbd) da noss chantun a la radunanza a Landquart. Vegnids èn dunnas ed umens cun plaschair per assister al cumià da lur cusseglier guvernativ Hansjörg Trachsel. Cun esser a fin ses uffizi pervia dal temp limità è la carriera politica per l'um da 65 onns istorgia il proxim mais, almain sin stgalim da l'executiva chantunala. Duas persunas che han gi e che han anc adina ina relaziun fitg amiaivla cun il cusseglier guvernativ partent han chattà ils plets adequats per dar al cumià in degn vestgì e l'onur meritaivla per il schef dal departament da l'economia publica. L'anteriur president dal cussegl guvernativ Gieri Luzi e cussegliera guvernativa Barbara Janom Steiner han en pled e maletg undrà l'activitad da lur ami da partida.

Adina guardà enavant

Gieri Luzi ha ditg che Hansjörg Trachsel saja adina stà ina persuna cun in vast orizzont pli che mo necessari e quai sco sportist, dentant er sco um da la politica. El haja adina guardà enavant e gi cleras finamiras, cumenzà il 1987 la carriera politica sco president da la vischnanca Schlarigna e s'auzà si per la stgala sin il champ politic fin tar il cusseglier guvernativ. Cussegliera guvernativa Barbara Janom Steiner ha ditg che per il cusseglier partent saja adina stada la devisa: star tar la chaussa e da far ina politica

pragmatica. Hansjörg Trachsel saja en mintga situaziun stà pront da gidar e da dar in cussegl necessari. El vegnia a mancar betg mo sco cusseglier guvernativ cun ina tenuta fitg autentica, mabain er sco ami en quel gremi, ha ditg Barbara Janom Steiner.

Andreas Felix nov president

Successur da Hansjörg Trachsel è Jon Domenic Parolini e dapi sia candidatura per quel uffizi è Benno Niggli stà al timun da la pbd da noss chantun. A Landquart ha

il nov cusseglier guvernativ da Scuol manà sia davosa radunanza da delegads sco president. Cun bler applaus han ils preschents lura elegi deputà Andreas Felix sco nov president da la pbd. Ils davos quatter onns è il successur da Jon Domenic Parolini stà schef da fracziun da la pbd grischuna e da preschent è l'um da 50 onns mainagestiu da l'Associaziun chantunala dals impressaris da construcziun. Elegi han ils preschents er las commembras ed ils commembers da la direcziun da la Partida burgais-democra-

tica da noss chantun. Quai èn: Gian Michael, Elisabeth Mani-Heldstab, Benno Niggli, Martin Aebli e Marco Müller. Ex uffizio a quel gremi appartegnan er Barbara Janom Steiner e Jon Domenic Parolini. Secretaria resta vinavant Edith Tschirky e nov schef da pressa da la pbd è Tim Hofer. Delegadas e delgads han lura er anc refusà quella saira las trais votaziuns federalas che stattan en tavla a la fin da quest mais e ditg gea a la refurma territoriala che vegn er en votaziun quella fin d'emna.



Regals per Hansjörg Trachsel, il cusseglier guvernativ partent e sia dunna Margrit Trachsel.